

यक गां यक जिल्हणु थी, तेस नउ पिंकी थियू। तसे यक कुवा बी थिआ, तेस नउ चिंकू थियू। पिंकी आज झणे धुणे कियो थी। सुआ रोज मेघे बझाइ जोड़ झणे धोड़ नोउथ बटो। आज धुप लगो थी। पिंकी झणे धूण जे गई त अपु कुवा बी साते निआ। दुहे जेड़ कोइए त बुढी पेअण केइ झणे धूण जे घेड़ गअ। पेअण पुठ पिंकी झणे सेले त चिंकू झीणी जोड़ खेलण लग गा। तसे ई बोलुं लगी, “चिंकू शरारत ना कर, मउं झणे धुण दे”। पिंकी झीणी जोड़ साभण लई त खरे मिन कइ पुओणी बड़ धुण लगी। पेअण पुठ बठो चिंकू ध्यान जोड़ अपु ईया हेरी बिशो थिआ। झणे धोड़ कइ दुहे जेड़ गी वापिस ऐड़ गअ। पिंकी झणे शुखाण जे तार जोड़ टाढी छड़े। झणे टढ कइ दुहे जेड़ अन्तर घेड़ गअ। होता भी बिशो थिए दे बियार लगण लग गई। झणे सोब उड़रुण लग गअ। पिंकी झणे टते त झणे होता अले थिए। पिंकी बहरीया हक दीती, “चिंकू, झठ बहरी अई त मउ जोड़ झणे बेढां दे”। चिंकू दुवा पुठ आ त तसे छते बियारी बेलि उड़रुण लगी। से तठियारी बोलुण लगा, “अउं बहरी ना ऐन्ता। अत तेज बियार अन्तर मे छते उड़री घेन्ती”। पिंकी शुणु त से नराज भोड़ गई। लेहरी कइ बोलुण लगी, “चिंकू, तें छते उड़रेलि त तु फिर बुखोरी सकता। झणे उड़रेल त से ना टेइन्ते”। चिंकू ईया पुछण लगा, “ईया, झणे कि चड़ी-चखुरु के इ असे ना जे उड़री घेन्ते”? किस अन्के बी पंख भुन्ते ना? चिंकू सवाल शुण कइ ईये लहर घेड़ गई। से हँस कइ बोलुण लगी, “चिंकू सुआ चीजे बगै पंखी बी उड़रती। जी रंग, पत्ते, होश.....झणे बी! अई में अबल कुवा, झठ झणे बेढां दे”। चिंकू ईये बोक शुण कइ झठ बहरी आ त अपु ईया जोड़ झणे बेढां लग गा।

कुछ खास खबर

- ◆ पांगी घाटी सोभि स्कूली के पहली केंआ नौमी तकरी रिजल्ट घोषित भोड़गे।
- ◆ रोहतांग जोत गाडी त महेणु सोभि जे बन्द भोड़ गोऊ।
- ◆ -पांगेइ मेहणु सरकार केंआ फ्लाइट करणे डिमांड कियो असी।

दुइ सियाणे अपु 60मी सालगिरा मना लगो थिए, भणेजी अपु पडनाँनी केआं पुछू

बबीता

60 साल लम्मा टेम भो,
तुसी कदि तलाक देणे
बारे ना सोचु ना?



तलाक! ना... ना, पर
मारणे सुआ लिंगि सोचु!

खुर शुणीणे बीमारी (यूरिक एसीडे बीमारी)

खुर शुणीणे बीमारी (यूरिक एसीडे बीमारी)

यूरिक एसीड यक फलतु चीज भो, यूरिक एसीड हें मुटुण जोड़ बहरी ऐड़ घेन्ता। हे शरीरे लहु अन्तर बि 4 केआ 5 मिली ग्राम यूरिक एसीड भुन्ता, अस केआ ज्यदा यूरिक एसीड बध घेणे बोलि खुर शुणीणे बीमारी एन्ती। यूरिक एसीडे निके-निके टुकडु हे जोड़ी अन्तर जमा भोड़ घेन्ते, इस बझाइ जोड़ खुर शुणी घेन्ते त चिणग लगती। खुर चिणग मुकयेल बी डाक्टरे बोलुण तकर या लहुए यूरिक एसीड 6 मिलि ग्राम केंआ घट भूण तकर दवा खाण बन्न न करीण। हर रोजे 4 या 5 लीटर पुओण पीण जरूरी असु, आगर अस खाणे चीजी के पेरहेज रखीयेल त एस बीमारी केंआ दुर रेही सकते, त एस बीमारी झट ईलाज बी भोड़ घेन्ता। **यूरिक एसीडे बीमारी जोड़ कि-कि न खाण:-** अराख न पीण, मउठे दाड, मासुं, घी त सिपरिया बी थोड़-थोड़ खाण। जपल दाड़, मसुं खाल त पुओण सुआ मतलब 5 या 6 लीटर पीण जरूरी असु।

तुबारि संपादकीय
टीम

◆ अस इ उम्मिद करूं लगे से कि एण बाडे दिन अन्तर सुआ मेहणु इस कम अन्तर सहयोग कते।

◆ इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पहुँ जे इ पत्रिका शुरु किओ सि।

◆ तुबारि यक अवाणिज्यिक पत्रिका भो।

◆ तुबारि पत्रिका कोइ मेहणु, जनजाति, त संस्कृति गल्लि कट्टेण जे नेई छपाण लगे। अगर कोइ ई सोचता बि त अस जिम्मेवार नेई।

◆ छपाणे पेहले सोभ आर्टिकल दुई टाई पांगेई मेहणु हरालो असे। इ त खुलि बोक असि कि पेह्लि बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆ आर्टिकल्स ना मिलएल, या घाटि मेहणु के मदद ना मिलएल त तुबारि पत्रिका कदि बि बंद भुई सकति।

◆ कोइ चिज छपां सि या नेई छपां जे तुबारि संपादकीय टीम पुरा अधिकार असा।

◆ अस किलाड केन्द्रीय पुस्तकालय, त बजार राखे ठेके भेइ हरिरामे दुकान अन्तर तुबारि ड्रॉप बॉक्स पुठ बि अणु सजाव ओर आर्टिकल्स रखूं जे सुविधा किओ असि।

◆ अस सोभि पांगि मेहणु जे हात जोड कई निवेदन कते कि, तुस बि कोइ अच्छा आर्टिकल, पुराणि या नौई कथा, कहावत, कविता, त नौवे घीत (पागवाली अन्तर) लिख कइ छपां जे हेंचदे दिए।

तुबारि संपादकीय टीम

9418431531

9418429574

9418329200

9418411199

9418411599



इ फियुडु तुसी मुबारक, इ गुलशन तुसी मुबारक।
अस रहिएल न रहिएल, इस नौआ साले 2015
तुसी सोबी सुआ-सुआ मुबारक त बधैं।

बियाह-वचन देण।

आज-कले दुनिये अन्तर सुआ झगडा त तलाक देणे बोक शुणुती। हें बियाह अन्तर बी जपल सुआ लडाई-झगडा भुन्ता, यकि होरी केहणा न मन्ते त यक जेइ अपु जिम्मेदारी पूरी ना निभान्ता तपल अस बी सोचते कि अपु धणि जुएलि केआ कपल छुटकारा मेइयाल। इ सोचते कि अब अस दुहे जेइ सांते ना विश सकते।

बियाह यक समझौता (contract) भो ना? असे मतलब यक जेइ समझौता टोड़ियाल त दोका से बी टोड़ि छता। यक जेइ समझौता ना मनियाल त जरुरी नेइ कि दोका जेइ बी अपु जिम्मेदारी निभाण। सोचीं दिए कि अ भो ना बियाह? “में जुएलि मउं जोइ सुसर विशेल त अउं बी सुसर विशता। से नेइ विशण लगे त अउं बी ना विशता। में गलती थोड़ी न भो, तसे गलती भो। अउं अपु रास्ते घेन्ता”। हेरे अ भो ना बियाहे मतलब? ना! ना! ना! ना! ना भो।

पेहलकण जुवाने दुइ मेहणु अपेपु बुच खुने वाचा बन्तेथ (covenant)। अपु खुन मियाइ कइ अपेपु बुच रिश्ता बडातेथ। असे मतलब यक जेइ किछ बी करियाल फिर बी होरा से तसे सात कदि न छता, अपु जिम्मेदारी पूरी निभान्ता। तिहाणि बियाह बी यक वाचा बन्दणे भो। इस अन्तर यक जेइ किछ बी करियाल दोका जेइ तसे सात ना छता। त अपु वादा ना टोड़ता। “अउं, त में जे कि असु, सोब तें भो! जपल जरुरत भोल त तें लिए अपु जिन्दगी बी दी सकती”। बियाह जिन्दगी भइ सात देणे वादा भो। मतलब “मउं मंजूर असु तु किछ बी करियाल त अउं पूरी जिन्दगी भइ तउ जोइ प्यार कती/कता। सिर्फ मौत मउं तऊ केआ अलग कइ सकती। मेइ तु अपु पूरी जिन्दगी लिए चुणो असी”।

बियाह कदि टूटि ना सकता। सिर्फ मौत टोड़ सकती। कोइ परीशानी, बीमारी, गरीबी, कोइ बी रिश्ता, पूरी जिन्दगी अन्तर ना कामयबी भोल त असी अपु बियाह ना टोड़ूं।

दुहि धणि-जुएलि बुच खरा त बुरा टेम, हसण त रोलुण जिन्दगी अन्तर सोब कठु भुन्त। इ भुण पता न लगयाल त जिन्दगी जीण मुशिकल भोइ घेन्ती। हे बियाह अन्तर खास शब्द प्यार नेइ, यौन सम्बन्ध नेइ, खुशी बी नेइ पर “वादा या वचनबध्ता” असा। नजर जोइ नजर मियाइ कइ प्रेम, प्यारे चकर, हथ जोइ हथ मियाइ कइ घुमण, गडे मियणु इ ना भो बियाह। पर बियाह मतलब कदि बी धणि-जुएलि यक-होरा छड़ ना देण।

यक अबल बियाह अन्तर खरे गभुरु भुन्ते। अन्त अन्तर अबल समाज बणंता। परिवार समाजे नींब भो।

